

Ensegnanc a scola d'istà

Te la Scola ladina de Fascia l'è peà via la seconda edizion di corsc de didatica di lengac mendres

Scola - Mencia amò n trat al scomenz de la scola, ma tel Lizeo de Poza jà chesta setemèna i ujes se à avert per n grop de dozenc e de studenc universitàres.

Se trata de la Scola da d'istà su la didatica di lengac locai, na scomenzadiva metuda a jir per l secondo an de seghit da la Scola Ladina de Fascia, col sostegn de la Provincia de Trent e l Servije mendranzes linguistiches, l'Università de Trent, l'Istitut Ladin "majon di fascegn" e l Comun General de Fascia.

Dozenc e studenc, rué da la region Trentin Sudtiroł e ence da etres raions desche l Friul, à tacà jà en lunsè ai 27 de aost a tor pèrt a la lezion che jirà inant con desvalives dozenc per 2 setemènes e che é states envièdes via dal dozent de linguistica catalana Andreu Bosch i Rodoreda.

Etres corsc vegn tegnui chesta setemèna dai professores Neval Berber, Ermenegildo Bidese e Simonetta Lucchi sui temes de lettradura e identità, e la setemèna che vegn sarà dedichèda enveze a l'aprofondiment di aspec antropologiches con Cesare Poppi, de la mitologia con Ulrike Kindl, de la musega con Fabio Chiocchetti e del derit con Simone Penasa.

Chesta seconda edizion de la Scola de didatica di lengac é stata averta da la Sorastanta de la Scola de Fascia Mirella Florian, che à rengrazià i reladores e i sostegnidores, e l'à recordà che chesta scomenzadiva é nasciuda da n besegn sentù de maor formazion da pèrt di dozenc (e di studenc che se enjigna a jir tel mond de la scola) che laora te n contest de plurilinguism o i ensejna te lengac mendres.

L suzess de la pruma edizion de



La sorastanta Mirella Florian (da man dreta) con la prof.a Patrizia Cordin de l'Università de Trent e l'assessor Luigi Chiocchetti, a l'inaudazion di corsc.

la scomenzadiva à spent la Scola de Fascia a endrezèr ence chest an l cors, a chel che se à scrit ite dozenc de la Scola de Fascia e de l'Istitut Comprensif de Perjen, che tol ite studenc mochegn, e studenc de la Universitàdes de Trent, Busan e Udin.

L'augurie de bon ejit per chesta scomenzadiva é ruà de persona da l'assessor regionèl a la mendranzes Luigi Chiocchetti e con messajes da l'assessora provinzièla Marta

Dalmaso e da la Procuradora Cristina Donei. La professora Patrizia Cordin de l'Università de Trent, à recordà l percors che, dal desch de lurier per meter adum i besegnes de formazion de la comunitàdes de mendranza, à portà a l'endrez de chest cors. L'ejit e la percacenza de chesta edizion de corsc vegnarà verificà te l'ultima giornèda, en vender ai 7 de setember domesdi, te na meisa torona con duc i partezipanc. (lg)



Dozenc e studenc te clas con l professor catalan Andreu Bosch i Rodoreda.